



## JUDICIAL SISTEM MONITORING PROGRAMME

## PROGRAMA DE MONITORIZASAUN DO SISTEMA JIDISIAL

### *Komunikadu Imprensa*

*Periodu: Juñu 2012*

*Edisaun: 14 Juñu 2012*

### **Tribunál Distritál Dili halo prosesu julgamentu ba kazu “*Infantisídiu*” ne’ebé akontese iha Suku Humboe, Distritu Ermera**

Iha loron 12 fulan Juñu 2012 Tribunál Distritál de Dili halo prosesu julgamentu ba kazu krime infantisídiu ne’ebé rejista ho Numeru Prosesu; 180/TDD/2012. Kazu ne’e akontese iha Suku Humboe, Sub Distritu Ermera, Distritu Ermera. Arguida ba kazu ne’e ho inisiál LJS ne’ebé prátika aktu krime hasoru nia bebe ne’ebé foin moris.

Prosesu julgamentu ba kazu ne’e dirije husi tribunál koleтиву ne’ebé kompostu husi Dr. Antonio Helder do Carmo no Dr. Antoninho Gonçalves ho Dr. Paulo Texeira Juiz Internacional. Parte Ministériu Públiku representa husi Dr. Nelson de Carvalho no arguida hetan asisténsia legál husi Dra. Marcia Sarmiento husi eskritóriu Defensoria Públiku, Ofisial de Justisa Sr. Julio Martins.

Diretór Ezekutivu JSMP Luis de Oliveira Sampaio haktuir katak, *JSMP hanoïn katak krime ne’e konsidera nu’udar krime seriu tanba ne’e husu ba tribunál kompetente atu aplika pena ne’ebé justu no realistiku ho krime ne’ebé arguida komete nune’e bele sai hanesan meus ida hodi eduka comunidade.*

Tuir kronolojia kazu ne’ebé hakuir iha Minstériu Públiku nian akuzasaun katak, iha loron 30/10/2011 iha aldeia Hatali Suku Humboe Distritu Ermera, maiz umenus iha oras tuku 02.00 kalan iha arguida ninia uma laran, bainhira arguida atu ba haris fatin hodi soe be derepente bebe moris no monu tun ba rai. Hafoin ida ne’e, arguida hakruuk tun hodi kous bebe depois tau iha hena lori tejora tesi bebe nia husar talin. Depois de tesi tiha bebe nia husar arguida hatoba tiha bebe hamutuk ho nia hodi fo susu. Bainhira arguida ho bebe toba lakleur ran sai barak husi bebe ninia husar to’o rezulta bebe mate.

Depois de akontesimentu ida ne’e nia rai hela mate isin durante loron ida nia laran no laiha familia ida mak mai vijita, ne’e duni nia decide atu ba ke rai kuak hodi hakoi tiha bebe ne’e.

Bázeia ba testemuña VM nia depoimentu haktuir katak antes ne’e sira hare duni arguida nia kondisaun isin rua maibé depois sira hare fali ba nia kondisaun ne’ebé normal entaun sira ba husu tuir katak arguida partus ona karik, maibe arguida resposta katak nia la partus tanba nia la isin rua.

Ne'e duni testemuña ho familia sira seluk iha suku refere buka tuir bebe ne'e no sira konsege hetan bebe nia isin mate ne'ebé arguida hakoi hela iha uma oin. Fatin ne'e to'os no aifarina laran no falun iha hena ida no hatama iha plastiku laran. Depois hakoi iha rai kuak no taka tiha rai no lori fatuk tau iha leten no kuda hela tan aifarina kain ida hodi hatudu katak ne'e laos rate ka fatin ne'ebé hakoi mate isin.

Depois deskobre tiha kazu ne'e testemuña informa ba xefe suco no polisia atu foti mate isin ne'e ba halo autopsia iha HNGV.

Bázeia ba faktus hirak ne'e Ministériu Públiku alega arguida prátika krime *Infantisidiu* ne'ebé regula iha artigu 142 Kódigu Penál Timor Leste ho ninia muldura penál tinan 3 to'o 10 prizaun.

Aleinde ne'e iha alegasaun finál, parte Ministériu Públiku haktuir katak arguida nia deklarasaun la reflata ho autus ne'ebé iha ona, nune'e mos iha deklarasaun testemuña nian hatudu katak aktu *infantisidiu* akontese tanba arguida bosok katak nia la isin rua maibé faktu hatudu katak nia isin rua no hahoris duni. Ho razaun hirak ne'e hotu Ministeriu Publiku husu ba tribunál koletivu atu aplika pena ida ne'ebé justu no kredivel tuir krime ne'ebé nia komete ho kastigu tinan 6 prizaun.

Julgamentu ba leitura akordaun sei hala'o fali iha dia 02 fulan Jullu, 2012 Oras; 14.00 lorokraik.

Atu hetan informasaun kompleitu bele kontaktu direitamente:

Luis de Oliveira Sampaio  
Diretór ezekutivu JSMP  
Email, [luis@jsmp.minihub.org](mailto:luis@jsmp.minihub.org)  
Telefone: 3323883/7295795